



QUÆSTIO MEDICA,

*Quodlibetariis disputationibus manè discutienda in Scholis
Medicorum, die Jovis decimâ-nonâ Novembris. 1716.*

M. PHILIPPO DOUTE', antiquo
Facultatis Decano, Præside.

An fluentium in corpore magna potentia?

I.



ORPUS humanum esse quid unum, qui contendit, Philosophus non est; unde doleret & à quo afficeretur, non haberet: Qui illud affirmat compagem partium continentium & contentarum, narrat quod oculis subjacet; his qui addit partes impetum facientes, cum Hippocrate graviter & acutè ratiocinatur. Partes continentès vocant solida, contentas dicunt fluentia, ut & impellentes Spiritus, suppellex vitæ fundatissima, Animæ vinculum cum corpore, naturæ robur & magna potentia: Partes solidas distinguunt figura, commercia, officia, opera: Fluentium potestates indigunt motus, circuitus, æstus, usus, sapor, temperies: Indè facultatum origo, functionum causa, temperatorum varietas, idiosyncrasia, vitæ beneficia, maleficia. Quibus legibus stet singulorum motus, omnium symmetria, confluxus, conspiratio, consensus;

A

Qui novit, intelligit unde homini vita, sanitas, morbus, mors contingant: peculiaris ad faciendam Medicinam dignotio quæ probat & asserit artificem.

II.

SOLIDORUM opera nulla sine fluentium interventu conspicua; nulla perfici possunt absque illorum influxu. Generatio, conceptio, nutritio, accretio, augmentum, motus, quot viventis functiones, tot mirandi Fluentium effectus. Generatio, conceptio, insitâ & immutabili motus Fluentium lege exercentur. Partium evolutio Fluentium vis maxima, ab ipsis surgit solidarum apparatus, fit in dies instructior in vitæ munia. Primordia vitæ palpitans cordis punctum, micat ab insito Fluente, rubrum pulsat à sanguine. Inchoata hæc hæmatosis absolvit vitæ curriculum, alimento quotidie multiplicatur, continuò propagatur; pars quælibet laudabili succo turghida erigitur, crescit, firmatur; noxio riget & turbatur, relaxatur inops, penitens orba deficit. Dentium eruptio à spirituum *ελαστικῶν*, eò felicior quò illa major & liberior. Ab ortu cuique sua sors pro Fluentium naturâ, dote, impetu: pro Illorum copiâ statim magnitudinis, quantitatis, limites, designata omnibus peculiaris proportio perfectionis, vigoris, inclinationis, dissolutionis; quasi redeunte ad carceres Fluente & ad idem principium unde erupit, flectente; Æternâ hâc motûs lege sibi par & aqua semper natura nascente aut desinente mundo, juventutis expers & leni. Fabulam narrant, qui humorum fontes aliunde, quàm à fluidis manare volunt, nec sapiunt illorum vires, qui hauriunt à solidorum tritu. Etsi millies tritum, permolitum & lavigatum corpus nusquam in se convertet ulius saporis indolem. Saporum vis omnis precaria de elementis nata; quot saporès, totidem parturientis mixturæ fœtus; nulli nisi fermentatione, coctione, solutione, secretione, contemperatione, maturatione delendi; inde produnt Fluentium innumere dotes, frequentiores quærelæ. Absque fluido nulla resiliendi facultas. Quæ elater nullus, conciliatur ejus consortio. Funes cymbarum rectores quâ parte aquis innatant, oscillatorio donantur motu; is in sicca vix sensibilis aut nullus. Quovis mochlico potentior Fluentis virtus. Lapides, qui ultrâ attonli

non poterant, excelsius protrusit simplex Fluidi adjectio. Tota in Fluidis natura. In naturâ nil præter Fluens & Solidum. Solidorum corporis magnum artificium, major Fluentium virtus. Nullus solidorum à seipsis motus, perennis Fluentium motio. Corpus humanum machina decantatur: pneumaticis aut hydraulicis organis instruantur aliquæ, nil absque aquâ & aere expectandum; alterutrius apparatu machinatio torquebitur, defectu hærebit immota. Illud ipsum in humanâ machinâ pariter admittendum, fluentis vis intus agit, infusa per artus, tota molem agitat & corporeo edificio indefinenter se miscet; aliunde iners, otiosum & exangue cadaver.

I I I.

ARGUMENTO sanè solidarum partium compagem non haberi efficientem causam functionum corporis. Inest quidpiam viventi, quò fit is potentior demortuo, & quò ad obeunda vitæ officia se comparet: talis causa in corpore quænam alia à Fluentium potentiâ? Hâc præsentè vita actioque omnis perficitur, hâc decedente, vita perit ac dissipatur. In hæc tamen commercia non parùm conspirant partium continentium nexus amabiles. Cui perspectum quanta functionum, quibus destinantur, varietas, ultrò notum, quàm necessaria organorum diversitas, omnis in gratiam Fluentium adornata comparataque; totuplex fermè, quotuplex Fluentium natura, species, usus; humor primigenius & radicalis aërius, aqueus, uniens, fixus in solidis. Alimentarius remotus chylus; proximus in parte, cuique suus, pro quadruplici, quam subit, mutatione vulgò dictus quadruplex *innominatus*, *ros*, *gluten*, *cambium*. Excrementitius naturalis individuo, per totum diffusus serum, ichor in sanguine, in vasis sanguis, partibus lymphæ; in parte secretus & collectus, bilis in cysti, cujus præcipua vis in amaro, limus sanguinis in liene, lymphæ in glandulis & pancreate: speciei propagandæ semen, alendæ lac. Inutilis, totius corporis, fæces alvi, urina, sudor, sordes; partis, uti capitis, oculorum, aurium, pulmonis: præter naturam, ex alimentario pus, ex excrementitio utili inutili ichores alienâ qualitate corrupti, pituita vitrea, acida, salsa, gypseæ, bilis vitellina, porracea, aruginosa, isatodes, atra. Omnes de sanguinis am-

plitudine, temperie oriundi veluti totidem de fonte rivuli, sanitatis opifices pariter & morbi. Sanguis à sanguine assimilari nihil potest nisi cognatione substantiæ. Quodlibet non fit ex quolibet, sed determinatum à determinato: iis, quibus nutriri quis potest, protinus non alitur: Inde multiplicis alterationis prima necessitas, eò major operosiorque futura, quò alimenti auctior contrarietas. Quod mollissimum, non uno statim impetu durum fit, quod durissimum, mollissimum. Ex pane, ex betâ, ex fabâ quomodo fiet sanguis, nisi hæc prius mutationem sint adepta, ad quam vario labore est opus? Præparat tritus, promovet saliva præsens chyloso compendium, solida, sicca, dura alimenta imbuat, colligit, macerat, in aliam speciem mutat, nec tamen omni ex parte perficit; jam antè affecuta cremoris naturam alimenta, ut sorbitiones, pulticulæ, intrita; aut mox affecutura, ut mollioris cibi apparatus omnis, retineri in ventriculo habent necesse; in suis contentum adhuc cibum ex aquâ & farinâ post quatuor horas oblatum dissecto ventre animadvertere est. Quare coctio aliud à chylosi, quemadmodum sanguificatio alia à nutritione. Ut sanguificatio à succi specie, nutritio à partis ideâ quam nutrire debet; ita ad coctionem oportet ut alibilis omnis materia expressum ventriculi substantiæ characterem sibi sumat in familiaritatis adeundæ tesseram hospitalem, cujus occasione tum illi adest privatæ nutritionis opportunitas; hæc miracula tanta Fluentium beneficia, proprietates indefinitæ, innumera potentia singulis in partibus ultrò conspicuæ.

I V.

FLUENTIUM crasis à legitima principiorum, quibus constant, unione. Juxtapositio non est unio. Crasis non secundum juxtapositionem corporum in minima divisorum. Mixtio non in illorum mutuo positu ad invicem mixtionem constituentium, sed in unione miscibilium, ita ut nulla portio illorum sit expers hujus mixturæ. Impermixtus humor non fermentescit. Sanguis utilisve succus in corpore vix ullibi sincerus. Vacuandi discernendique studium ideo indefinens vitæ officium, ne momento cessans sine sanitatis dispendio. Ut vino non accedit gratia & saliva, nisi fermentationis ope, ita & sanguini integritas; utraque ex toto corrupta nusquam redeunt

ad pristinam naturam : Ut autem corruptelæ alius atque alius modus est , ita & medelæ. Haud erit proinde cuiquam admirationi tantus & talis apparatus instrumentorum , quorum alia debentur Fluentibus defacandis , separandis alia , alia transmittendis , suscipiendis alia , alia expellendis , salubribus succis in omnem partem ferendis alia , alia motibus obeundis inserviunt , sensationibus alia. Ut in musculis villi ad nutum nostrum aëris & sanguinis præsentia motum efficiunt , ita & naturalibus instrumentis recti villi solâ Fluentium ope contracti sursum pellunt , transversi astricti subditam capacitatem in angustum adducunt , & quidquid eâ concipitur detrudunt ; obliqui æquabiliter intenti omnia planè continent , nil sursum aut deorsum movent. Cuicumque instrumento triplex hujus munus accessit , triplex Villorum genus à naturâ concessum , cujusque robur , tonus , temperies à Fluentium naturâ , dote , temperie. Cor musculus. Constanti robore Fluentium libramentum est ; sanguis in hujus sinubus dilatatus , majorem locum occupans pullum facit , inde angustiarum impatiens è corde emissus eique circumpulsione redditus alternos habet recursus ex arteriis in venas. Hoc ita redituque universâ veluti radiatione totum corpus vivificat. In sensuum organis excubans animam provocat ad intelligendum , anima pariter Fluens regit ad arbitrium moto spiritu quo ducitur. Sub hoc æstu & impetu Fluentium quàm mirè torquentur solida ! Quis non expertus in humores mentis dominium , ad cuius nutum ita sæpenumero conspicias in aliis partibus insiti caloris opus fervere , desiderari in aliis , ac vacare tandem. Unde præ cæteris pronior in obsequia spiritus , itque reditque viam , ac viscera modò totus penè deserit , cùm corporis effusus ambitu præceps palatusque procurrit. Jussus modò iterum se recipit castris , vitæque laribus condit. Hinc illinc manant derivanturque fontes perturbationum ; exinde plenas & integras Fluentium in corpore vires accipimus. Viden' laborantis in foeta muliere appetentiæ errores ex fide representari ? Quid ira , timor , gaudium damni non afferunt : mens juxta corpusque percellitur , vitæ munia inturbantur ; amore , lætitiâ , desiderio animæ jucundâ commotione sanguis præter solitum & pacatum cursum ad superficiem corporis erumpit ; unde vividus in cute color efflorescit : odio , mœrore , metu

ad corporis centrum citò revocatur. Gravius importat malum subitus & improvisus timor, & quæ animum excoquant, gravantque curæ. Pavidis antliæ cordis pereunt, ordine nullo, inconditè, densè, subsultim micant arteriæ, præcordia intestinâ obsidione cinguntur, sub pondere Fluentium premuntur vitalia. Quid plura; non aliter ac procellæ annem quietum quoquoersum impellunt, pariter animi pathematis Fluentia motum solidorum interturbant, ita vincunt ac subjugant, ut boni malive præsentis vehementi opinione tarda lethi necessitas subitò corripit gradum; tantæ scilicet molis sunt in corpore Fluentia, tantæ virtutis ac potentia.

V.

EA ratione corporis naturam omnino subvertunt qui Fluentium indolem, efficaciam acceptam solidis referunt. Ad illorum vim nil confert ipsa moles partium; in magnis corporibus non semper magnæ virtutes, nec in exiguis exiguæ. In corpore humano advertendum movens & motum; Fluens & solidum. Inde repetenda partium ejus præcipua vis & potentia. Impellens artificis rationem subit, impulsus instrumenti. His concurrentibus publica privatave vitæ officia exercentur. Fluentis gratia ad omnes venit, solidi verò spectatur in singulis. Illius una omnium, hujus diversa singulorum. Illa movet partes singulas, hæc unaquæque sibi contititur. Aër circumfusus, vitalis Fluens ponderis, & elaterii succussu per cunctas corporis partes indefinenter permeat. Ad hunc excipiendum ut & expellendum scitè admodumque affabrè conformata pectoris & pulmonum fabrica, præeunte & alternante hoc motu Fluentia ocysimè percurrunt. Sanguis, succorumque supellex aptissima singulis functionibus obeundis, ad partes prorumpit & continuo agitur. Ad Fluentis odorem unaquæque viget, & efflorescit. Non secus ac in hydraulicis machinis aqua per tubos figurâ, posita, porisque dissimiles irruens innumeras motiones ad Naturæ exemplar subtiliter exprimit, quæ, cum supprimitur, illico desinunt; pariter in corpore, quò feruntur humores, facultas & vis potior, absque illorum concursu nulla pars actionem ullam ostendere poterit & tueri: hinc collige totæ mortis genera, quotuplices sunt intercipiendi Fluentis

modi. Emortuo eadem partium solidarum configuratio, cur vitæ munia obire nequit? abest vitalis Fluentium potentia; hanc flabello aliâve arte intrâ pulmones & vasa si daretur excitare, quâ ratione Fluentium energiam, hâc eâdem, quasi spiritu à quatuor ventis insufflante, similem exhiberes vitæ imaginem. Demum cum ex recepto axiomate, illud maximè tale, quod cæteris causa est ut talia existant, instrumentorum supellectile & ornatu licet instructa corporis machina vitam exercere, nutriri, crescere cum non possit nisi præsentia Fluentium, ope & interventu, quorum vires regere, excitare, intendere, remittere, temperare, frangere, ut præcipuum medentis officium, sic in ipsius est potestate Fluentium adjectione detractiove vitæ spatia laxare, & ultrâ perennare, rectè inferitur.

Ergo Fluentium in corpore magna potentia.

Domini Doctores disputaturi.

M. Joann. Depiney Pefchard.	M. Petrus Azevedo, Pharmaciacia Professor.	M. Franciscus Gœûel.
M. Philippus Fontaine.	M. Joannes Herment, Medicus Regis ordinarius.	M. Joannes-Baptista Doye, Ex-Decanus.
M. Antonius Pepin.	M. Stephanus Fr. Geoffroy, Regia Scientiarum Academiæ Parisiensis, Regiæ Societatis Londinensis Socius, Lector & Professor Regius.	M. Urbanus Leaulié.

Proponebat Lutetiæ MICHAEL-LUDOVICUS VERNAGE
 Parisinus, Baccalaureus Medicus, die Jovis 19 Novembris,
 A. R. S. H. 1716. à sextâ ad meridiem.